

ԱՉԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ԶՈՒՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Է. Տարի, Թիւ 311, Ուրբաթ, 27 Նոյեմբեր, 2015

ՀԱՄԱՅՆՔԱՅԻՆ

ԼԻԲԱՆԱՆԻ ԱՆԿԱԽՈՒԹԵԱՆ ՏՕՆԻ ՆՇՈՒՄ

Կիրակի, 22 Նոյեմբերի երեկոյեան կազմակերպութեամբ Քուէյթի մօտ Լիբանանի դեսպանատան տեղի ունեցաւ Լիբանանի անկախութեան 72 ամեակի նշում:



Այս առթիւ կազմակերպուած յատուկ ընդունելութեան իր մասնակցութիւնը բերաւ Թեմիս Առաջնորդ Գերայ. Տ. Մասիս Ծ. Վրդ. Զօպուեան, որուն կ'ընկերանային գաղութիս հոգեւոր հովիւ՝ Արժ. Տ. Արտակ Քինյ. Քէհեաեանը եւ յարաբերական յանձնախումբի ատենապետ՝ Մարքօ Պապլանեան: Հայր Սուրբը շնորհաւորեց դեսպան՝ Խըտըր Հուլուէն եւ դեսպանատան անձնակազմը:

Օրդ. Թամար Չոլաքեանի Այցը Քուէյթի Ազգային Վարժարան

Երեքշաբթի, 24 Նոյեմբեր 2015-ին, վարժարանս այցելեց նախկին սաներէն՝ Օրդ. Թամար Չոլաքեան, վարժարանիս բարեկամներէն Պրն. Գարլօ Աստուրեանի հետ: Վարժարանիս տնօրէն՝ Պրն. Մանուկ Մանուկեան ջերմօրէն դիմաւորեց համեստափայլ հիւրը: Վերջինս բարի գալուստի մաղթանքներէն ետք իր կարգին ծանօթացուց հիւրին վարժարանիս բաժինները ու նուիրեց վարժարանիս յիսնամեակին նուիրած «Յուշամատեան»ը:



Օրդ. Թամարի հետ մեր հանդիպման ընթացքին առիթ ունեցանք մօտէն ծանօթանալու իր մասին: Թամար Չոլաքեան, 1987 թուականին ծնողին հետ փոխադրուած է Ամերիկեան Միացեալ Նահանգներ ու հաստատուած Քալիֆորնիա նահանգ, երբ Բ. կարգի աշակերտ էր Քուէյթի Ազգային Վարժարանէն ներս:



Ճեմարանը աւարտելէ ետք մասնագիտացած է լրագրութեան եւ ընկերային ծառայութեան մէջ ու ստացած է համապատասխան վկայականներ: Ներկայիս կը ղեկավարէ իր սեփական գործը ԱՄՆի մէջ:

Հանդիպման աւարտին Օրդ. Թամար լրագրոյնն ու բարին մաղթեց վարժարանիս տնօրէնութեան, աշակերտներուն եւ համայնքիս զաւակներուն:

ՀԱՅԿԱԿԱՆ

Նոր Փոփոխություններով` Ընդդիմութեան Իրաւունքները Կը Պահպանուին

Վայք շրջանի ընտրողներուն հետ ունեցած հանդիպումին ընթացքին ՀՅԴ Երեւանի քաղաքային կոմիտէի ներկայացուցիչ Բագրատ Եսայեան` խօսելով սահմանադրական փոփոխութիւններուն մասին, դիտել տուաւ, որ անոնցմով կը ստեղծուին բոլոր նախադրեալները երկիրը միակուսակցական վտանգէն պաշտպանելու: Ան բացատրեց, թէ ինչպէ՛ս կարելի է իրականացնել այդ մէկը, թէ ի՛նչ կը նշանակէ ձեւաւորել կայուն մեծամասնութիւն, եւ թէ ի՛նչ է ատոր առաւելութիւնը: Բ. Եսայեան ընդգծեց, որ սահմանադրական բարեփոխումներով կարելորութիւն կը տրուի գործօն իշխանութիւն ձեւաւորելու մեքանիզմներու ստեղծման:

«Այսօր գործող համակարգով միակուսակցականութիւնը արդէն իսկ արմատացած է, սակայն առաջարկուող փոփոխութիւններով կը վերանայ մեծամասնական ընտրակարգը, կուսակցութիւնները, ձայն ստանալով, կրնան կազմել գործադիր իշխանութիւն, որ խորհրդարանին մէջ կրնայ ունենալ մեծամասնութիւն, որպէսզի ճգնաժամ ջառաջանայ, եւ Հայաստանը չդառնայ անկայունութեան վայր», ըսաւ ան:

Ըստ ՀՅԴ-ի ներկայացուցիչին, Հայաստանի մէջ ցարդ տեղի ունեցած 5 խորհրդարանական ընտրութիւններուն համամասնական ցանկով չէ եղած պարագայ մը, երբ որեւէ կուսակցութիւն բացարձակ մեծամասնութիւն ստանայ: Նոր փոփոխութիւններով` ընտրութիւններուն շատ ձայներ հաւաքած կուսակցութիւնը, եթէ չստանայ մեծամասնութիւն, խորհրդարան հասած միւս կուսակցութիւններուն հետ ստիպուած է բանակցութիւններ վարել, որպէսզի կառավարութիւն ձեւաւորուի: Բագրատ Եսայեանի համաձայն, եթէ ընդդիմութիւնը յաջողեցաւ ընտրութիւններու առաջին հանգրուանին մեծամասնութիւն ձեւաւորել, կառավարութիւնը կը կազմաւորուի, իսկ եթէ մեծամասնութիւն ստանայ իշխող կուսակցութիւնը, ապա ան պէտք է համախոհութիւն կազմէ, այլ կուսակցութիւններ հրաւիրէ եւ, ըստ այդմ, կազմէ կառավարութիւն:

«Առաջարկուող բնորոշով, երկրորդ հանգրուան անցած կուսակցութիւնները (առաջին եւ երկրորդ դիրքը գրաւած) կարելիութիւն ունին նոր պլոքներ կազմելու խորհրդարան անցած կուսակցութիւններէն եւ առիթ տալու, որ ժողովուրդը ընտրէ, թէ իրենցմէ ո՞ր մէկը պիտի դառնայ մեծամասնութիւն: Եւ եթէ երկրորդ հանգրուանին կուսակցութիւններէն մէկը ստանայ նոյնիսկ 99 տոկոսի մեծամասնութիւն, միեւնոյն է, խորհրդարանին մէջ այդքան տոկոս ձայներ չ'ունենար, այլ կ'ունենայ ընդամենը 54 տոկոսի ձայն, ոչ աւելի: Իսկ կարելոր պաշտօններու նշանակումը կարելի է միայն 60 տոկոսի ապահովման պարագային: Իշխանութեան` 54 տոկոս ձայներ ստանալու պարագային, խորհրդարան անցած միւս կուսակցութիւնները, մանաւանդ` ընդդիմութիւնը կրնան ազդել շատ կարելոր պաշտօններու նշանակման վրայ, որոնց կարգին` գլխաւոր դատախազի, Կեդրոնական դրամատան նախագահի, Կեդրոնական ընտրական յանձնախումբի ղեկավարի պաշտօնները», ըսաւ ան:

Եսայեանի համաձայն, նոր համակարգը կարելիութիւն կու տայ ընտրութիւններով հասնելու իշխանափոխութեան: «Այսօր իշխանութիւնը ունի 100 տոկոս իշխանութիւն, իսկ ընդդիմութիւնը որեւէ լծակ չունի ո՛չ իշխանութեան վրայ ազդելու, ո՛չ ժողովուրդին վիճակը բարելաւելու: Մենք կ'առաջարկենք ձեւաւորել միասնական համակարգ` ուժեղ իշխանութիւն եւ ուժեղ ընդդիմութիւն», նշած է ան:

Գանձասարի Մէջ Մատենադարանի Բացում



Լեռնային Ղարաբաղի Հանրապետութիւն տուած այցելութեան ծիրին մէջ, Հայաստանի Հանրապետութեան նախագահ, զինուած ուժերու գերագոյն գլխաւոր հրամանատար Սերժ Սարգսեան 21 Նոյեմբերին Արցախի նախագահ Բակօ Սահակեանի հետ Գանձասարի մէջ ներկայ գտնուած է Ստեփանակերտի «Մերոպ Մաշտոցի անուան մատենադարան-գանձասար» գիտամշակութային կեդրոնի՝ Մատենադարանի մասնաշէնքի բացման արարողութեան:

Կեդրոնը կը բաղկանայ գիտական եւ թանգարանային մասերէ, գիտաժողովներու, մշակութային տարաբնոյթ նախաձեռնութիւններու համար նախատեսուած դահլիճէ, գրադարանէ ու ընթերցասրահէ: Նորաբաց ցուցասրահներուն մէջ ներկայացուած են Արցախի մէջ կանուխ միջնադարէն մինչեւ նոր շրջան ստեղծուած հարիւրէ աւելի ձեռագիրներու, Արցախի պատմութեան առնչուող հազուագիւտ վաւերագիրներու բնագիրներ եւ ընդօրինակութիւններ, ինչպէս նաեւ հնատիպ գիրքեր: Ցուցանմուշներու ստեղծման աշխատանքները սկսած են եօթը տարի առաջ եւ, պատասխանատուներուն համաձայն, պիտի ունենան շարունակական բնոյթ:

Բացման արարողութեան զուգահեռ տեղի ունեցած է նաեւ Մատենադարանի գիտաշխատողներու «Արցախի մանրանկարչական արուեստը» եւ «Արցախի գրչութեան կենտրոնները» գիրքերու շնորհահանդէսը: Գանձասարի գիտամշակութային կեդրոնի բացման առիթով նախագահ Սերժ Սարգսեան կեդրոնին նուիրած է 12-13-րդ դարերու Գիւլիստանի Աւետարանը:

Մատենադարանի շէնքը հիմնովին նորոգուած է «Փիւնիկ» մարդկային պաշարներու զարգացման համահայկական հիմնադրամին միջոցներով: Մասնաճիւղը պիտի գործէ Մերոպ Մաշտոցի անուան Մատենադարանի կառոյցին մէջ եւ անոր լիարժէք գործունէութեան աշխատանքներուն մէջ պիտի կիրարկուի Մատենադարանի գիտական ու թեքնիք ամբողջ ներուժը:

Հայկական երկու հանրապետութիւններուն նախագահները նաեւ ներկայ գտնուած են Հայաստանի եւ Լեռնային Ղարաբաղի զինուած ուժերու բարձրագոյն սպայական կազմին մասնակցութեամբ տեղի ունեցած խորհրդակցութեան, որուն ընթացքին քննարկուած են երկկողմանի փոխադարձ գործակցութեան առնչուող շարք մը հարցեր:

Հանրապետութեան նախագահը մասնակցած է նաեւ Լեռնային Ղարաբաղի Հանրապետութեան մայրաքաղաքին մէջ սպաներուն համար սպայական աւանի մէջ կառուցուած 176 բնակարաններէ բաղկացած բնակելի շէնքերու յանձնման, պաշտպանութեան նախարարութեան ղեկավարման մարմիններու մարզադահլիճի, ինչպէս նաեւ զօրամասերէն մէկուն զինուորական անձնակազմին համար կառուցուած ճաշարանի բացման արարողութիւններուն:

Լեռնային Ղարաբաղի Հանրապետութիւն կատարած աշխատանքային այցելութեան ծիրին մէջ Հայաստանի նախագահին կողմէ պարգևատրուած են բարեխիղճ ծառայութեամբ ուշադրութիւն գրուած զինուորներ:

«Գործող Սահմանադրութեամբ՝ Դուրսէն Եկող Ճնշումները Կրողը Միայն Մէկ Հոգի Է» Կ'ըսէ Արմէն Համբարձումեան

Սահմանադրական բարեփոխումներու քարոզարշաւի ծիրին մէջ ՀՅԴ Հայաստանի Գերագոյն մարմինի անդամ Արմէն Համբարձումեան հանդիպում ունեցաւ Վայոց ձորի մարզի Ազարակաձոր համայնքի բնակիչներուն հետ:

Ան իր ելոյթին ընթացքին ընդգծեց, որ գործող սահմանադրութեան յոռեգոյն կողմերէն մէկը այն է, որ կառավարումը միակեղրոն է, ամէն ինչ կը վերահսկուի միայն մէկ անձի կողմէ: Համբարձումեանի խօսքով՝ որքան ալ մարդիկ դժգոհին այսօրուան իրականութենէն եւ պահանջեն փոխել անիկա, որեւէ բան պիտի չըլլայ, որովհետեւ տակաւին փոփոխութիւնները արմատական բնոյթ չունին: Համբարձումեանի բնորոշումով՝ շինութեան հիմքը պէտք է ամուր ըլլայ, որպէսզի այդ հիմքին վրայ կառուցուող որեւէ կառոյց դիւրաբեկ ու խարխուլ չըլլայ: Այս շրջագիծին մէջ Համբարձումեան կարեւոր նկատեց Հայաստանի կառավարման համակարգի փոփոխութիւնը: Ան համոզում յայտնեց, որ երկրի վատ վիճակին մեղաւորները ոչ թէ անհատներն են, այլ կառավարման համակարգը, որովհետեւ ամէն ինչ կեղրոնացած է մէկ հոգիի ձեռքը, եւ այդ պայմաններուն մէջ աւելին ակնկալելը պարզապէս միամտութիւն է:

Համբարձումեան շեշտեց, որ երկրի սխալ կառավարման հիմքերը դրուած են 90-ական թուականներէն, երբ Հայաստանի Հանրապետութեան առաջին նախագահ Լեւոն Տէր Պետրոսեան որեւէ նախընտրական ծրագիր չունէր, սակայն բոլորին կը յորդորէր ընտրել զինք:

«Բարեփոխուած սահմանադրութիւնը, կարելիութեան սահմաններուն մէջ, կ'անկախացնէ դատական համակարգը, ինչ որ ամէնէն կարեւոր կէտն է: Ձեզմէ իւրաքանչիւրը ներկայիս դատական համակարգին թերի կողմերը, անշուշտ, ճաշակած է: Մէկ հոգին կ'որոշէ ամէն ինչ: Մէկ հոգին կը կառավարէ ամէն ինչ: Նոր սահմանադրութեամբ՝ դատարանի նախագահը երեք տարիէ աւելի չի կրնար պաշտօնավարել: Որեւէ կառավարման օղակ նոր օրէնքով պիտի ունենայ իր անմիջական վերահսկողը, որ, բնականաբար, պիտի կարենայ որոշումներ տալ:

«Նոր սահմանադրութեամբ՝ վարչապետը տարին երկու անգամ պիտի ներկայանայ Ազգային ժողով՝ հաշուետուութիւն ներկայացնելու: Խորհրդարանը կրնայ իր անվստահութիւնը յայտնել», ըսաւ Համբարձումեան:

Համբարձումեան ընդգծեց նաեւ, որ գործող սահմանադրութիւնը ամբողջ պատասխանատուութիւնը վերապահած է հանրապետութեան նախագահին եւ դուրսէն եկող ճնշումներուն կրողն ալ միայն մէկ հոգի է՝ հանրապետութեան նախագահը: Ան յիշեց հայ-թուրքական արձանագրութիւններու ստորագրումը, մէկ գիշերուան ընթացքին Եւրասիական տնտեսական միութիւն մտնելու որոշում տալը: Ըստ Համբարձումեանի, յաջորդը Ղարաբաղն է:

ՀՅԴ Եւրոպայի Երիտասարդական Միութիւններու Խորհրդաժողով. Մամլոյ Հաղորդագրութիւն

20-էն 22 Նոյեմբեր 2015-ին ՀՅԴ Ֆրանսայի «Նոր Մերունդ» երիտասարդական միութեան կազմակերպութեամբ եւ ՀՅԴ Բիւրոյի Երիտասարդական գրասենեակին համադրումով տեղի

ունեցաւ ՀՅԴ Եւրոպայի երիտասարդական միութիւններու խորհրդաժողով՝ «ՀՅԴ երիտասարդութիւնը եւ Հայ դատի վերանորոգ պահանջատիրութեան պայքարը» նիւթով:

Փարիզի եւ Արֆուվիլի մէջ տեղի ունեցած նիստերուն մասնակցեցան 8 երկիրներէ աւելի քան 70 ներկայացուցիչներ: Խորհրդաժողովին ընթացքին զեկուցումներով հանդէս եկան ՀՅԴ Բիւրոյի անդամներ Արմէն Ռուստամեան եւ Սուրատ Փափազեան, ՀՅԴ Բիւրոյի Երիտասարդական գրասենեակի պատասխանատու Սարգիս Մկրտչեան, ՀՅԴ Եւրոպայի Հայ դատի յանձնախումբի նախագահ Գասպար Կարապետեան, Արեւմտահայոց հարցերու ուսումնասիրութեան կեդրոնի տնօրէն Հայկազուն Ալվրցեան եւ ՀՅԴ Ֆրանսայի Կեդրոնական կոմիտէի ընկերներ:

Եռօրեայ դասախօսութիւններուն ընթացքին քննարկուեցան Հայաստանի ներքաղաքական իրավիճակը, Արցախի բանակցային գործընթացներու վերջին զարգացումները, Հայաստան-Թուրքիա յարաբերութիւններու ներկայ վիճակը, Ցեղասպանութեան հատուցման եւ հողային պահանջատիրութեան հարցերը եւ անոնց վերաբերեալ ՀՅԴ-ի Հայ դատի ռազմավարական սկզբունքները, քրտական հարցը, ինչպէս նաեւ Թուրքիոյ հայութեան խնդիրները:

Քննարկումներու եւ աշխատանոցներու ճամբով խորհրդաժողովը հասաւ հետեւեալ եզրակացութիւններուն.

1.- Հայ երիտասարդութեան պատրաստուածութեան մակարդակը պահանջատիրութեան աշխատանքներուն առնչութեամբ կը մնայ անբաւարար: Այս մարտահրաւերը յաղթահարելու համար, խորհրդաժողովը կը գտնէ, թէ անհրաժեշտ է ընդլայնել ՀՅԴ երիտասարդական միութիւններու շարքերը, ընդարձակել երիտասարդական եւ պատանեկան միութիւններուն աշխարհագրական տարածականութիւնը, ինչպէս նաեւ բարձրացնել անոնց պատրաստուածութեան մակարդակը, մղելով երիտասարդները քաղաքականացած եւ մասնագիտական աշխատանքներու:

2.- ՀՅԴ երիտասարդութեան կեցուածքը հատուցման խնդիրին եւ հողային պահանջատիրութեան նկատմամբ անփոփոխ է ու հետեւողական: Ուիլսընեան իրաւարար վճիռով պահանջուող տարածքները կը կազմեն հայ երիտասարդութեան պահանջատիրութեան առանցքը:

3.- ՀՅԴ երիտասարդներու յաւելեալ քաղաքականացումը ուղղակիօրէն կը նպաստէ օտար երիտասարդութեան մօտ հայանպաստ կեցուածքներու զարգացման՝ Արցախի անկախութեան միջազգային ճանաչման, հայութեան իրաւունքներուն հատուցման եւ հողային պահանջատիրութեան հարցերուն առնչութեամբ: Միաժամանակ, խորհրդաժողովը կ'ընդգծէ տեղական եւ միջազգային քաղաքական կազմակերպութիւններու հետ առկայ յարաբերութիւններու խորացման անհրաժեշտութիւնը:

4.- ՀՅԴ երիտասարդութիւնը կարելոր կը նկատէ պահանջատէր պոլսահայ երիտասարդութեան աշխատանքը: Խորհրդաժողովը կը գտնէ, թէ իրենց հայկական արմատներուն վերադարձող Արեւմտեան Հայաստանի եւ Թուրքիոյ հայութեան իրականութիւնը կը բանայ նոր մարտահրաւերներ ու հորիզոններ, ինչպէս նաեւ աշխատանքի նոր կարելիութիւններ:

5.- Նկատի առնելով շրջանային զարգացումներու եւ Թուրքիոյ ներքին իրավիճակը՝ ՀՅԴ երիտասարդութիւնը հայ-քրտական յարաբերութիւններուն կը մօտենայ քաղաքական իրատեսութեամբ եւ հայութեան իրաւունքներուն նկատմամբ իրաւատէրի կեցուածքով:

Հայոց ցեղասպանության 100-ամեակին ետք, հատուցման եւ հողային պահանջատիրությունը կը թեւակոխէ նոր հանգրուան, որուն յաջողութեան համար անհրաժեշտ է պահանջատէր հայ երիտասարդութեան կողմէ գործնական պայքարի ծաւալում: ՀՅԴ երիտասարդական միություններու այս խորհրդաժողովի ընթացքին փոխանցուած գիտելիքները, քննարկումներն ու եզրակացութիւնները կը միտին յաւելեալ թափ տալու այս պայքարին:

**ՀՅԴ ԵՒՐՈՊԱՅԻ ԵՐԻՏԱՍԱՐԴԱԿԱՆ
ՄԻՈՒԹԻԻՆՆԵՐՈՒ ԽՈՐՀՐԴԱԺՈՂՈՎ**

Ռուսիոյ Խորհրդարանին Մէջ Կրնայ Քննարկուիլ Հայոց Ցեղասպանութեան Ժխտումը Քրէականացնող Օրէնքի Նախագիծ

25 Նոյեմբերին Արդար Ռուսիա կուսակցութեան նախագահ Սերկէյ Միրոնով յայտարարած է, որ մտադիր է Ռուսիոյ խորհրդարանին մէջ քննարկման ներկայացնել Հայոց ցեղասպանութեան ժխտումը քրէականացնող օրէնքի նախագիծ:

«Մենք յառաջիկայ օրերուն խորհրդարանին պիտի ներկայացնենք օրինագիծ մը, ինչպէս ատիկա կատարուեցաւ Ֆրանսայի մէջ, որպէսզի երկրին մէջ քրէօրէն պատժուին Հայոց ցեղասպանութիւնը ժխտողները: Բոլորին համար պարզ է պատմական այդ փաստը՝ Ցեղասպանութիւնը, որ հայ ժողովուրդին նկատմամբ գործադրած է Թուրքիա», ըսած է Միրոնով՝ Թուրքիոյ յիշեցնելով իր անցեալը: Սերկէյ Միրոնովի համաձայն, Թուրքիան 24 Նոյեմբերին ջախջախելով ռուսական պատերազմական օդանաւ մը, անգամ մը եւս հաստատեց, որ միջազգային ահաբեկչութիւնը սնող պետութիւն է:

«Քաթար Էյրուէյզ»-ը Դէպի Երեւան Թռիչքներու Պիտի Սկսի

24 Նոյեմբերին «Արմէնիա» միջազգային օդակայաններ» ընկերութիւնը հաղորդած է, որ յաջողութեամբ աւարտած է բանակցութիւնները Քաթարի օդանաւային ընկերութեան՝ «Քաթար Էյրուէյզ»-ի հետ: 2016-ին ընկերութիւնը պիտի սկսի Տոհա-Երեւան թռիչքներուն:



Նշենք, որ վերջին շրջանին բանակցութիւնները աւելի արագ ընթացք ստացան, երբ «Իթթիհատ» ընկերութիւնը յայտարարեց Հայաստանի ուղղութեամբ թռիչքները դադարեցնելու իր մտադրութեան մասին:

«Մենք շատ հպարտ ենք, որ «Քաթար Էյրուէյզ»-ը, որ երեք տարի անընդմէջ ճանչցուած է տարուան լաւագոյն օդանաւային ընկերութիւն, Հայաստանը ընտրած է իր նոր ուղղութիւններէն մէկը», նշուած է «Արմէնիա» միջազգային օդակայաններ»-ու հաղորդագրութեան մէջ:

«Քաթար Էյրուէյզ»-ը Միջին Արեւելքի մեծագոյն ընկերութիւններէն մէկն է, ունի մեծ ցանց եւ աւելի քան 140 ուղղութիւններով թռիչքներ կը կատարէ:

ՄԻՋԱԶԳԱՅԻՆ

Ռուսական «Սու-24» Մը Չախջախուեցաւ Սուրիա-Թուրքիա Սահմանին Մօտ

Ռուսիոյ պաշտպանութեան նախարարութիւնը հաղորդեց, որ ռուսական «Սու-24» տիպի օդանաւ մը 6 հազար մէթր բարձրութեան վրայ թռիչք կատարած ատեն ցամաքէն կրակոցի ենթարկուելուն պատճառով ջախջախուած է Սուրիա-Թուրքիա սահմանին մօտ:

Նախապէս թրքական զինուորական աղբիւր մը յայտնած էր, որ թրքական «Էֆ-16»-ի մը կողմէ վար առնուած է օդանաւ մը՝ Թուրքիոյ օդային տարածքը խզելուն համար, իսկ սուրիական լաւատեղեակ աղբիւրներ լիբանանեան «Նաշրա» կայքին յայտնած էին, որ սուրիական օդանաւ մը հակաօդային պաշտպանութեան զենքերու կողմէ խոցուելէ ետք ջախջախուած է Լաթաքիոյ հիւսիսային գիւղական շրջանին մէջ:

«Ռոյթըրը» իր կարգին նշեց, որ ռուսական օդանաւը վար առնուած թրքական 2 «Էֆ-16»-երու կողմէ:

«Ռուսիա Թուրքիոյ Հետ Պատերազմի Զի Պատրաստուիր» Ըսաւ Լաւրով

Ռուսիոյ արտաքին գործոց նախարար Սերկէյ Լաւրով իր թուրք պաշտօնակից Մելուք Չաուշօղլուի հետ հեռաձայնային հաղորդակցութեան մը ընթացքին յայտարարեց. «Թուրքիոյ դէմ պատերազմ շղթայագերծելու չենք պատրաստուիր, թուրք ժողովուրդին նկատմամբ մեր վերաբերմունքը չէ փոխուած: Միայն հարց ունինք թրքական ղեկավարութեան հետ»:



Ան ըսաւ, որ Ռուսիոյ ղեկավարութիւնը Թուրքիա այցելելու կամ վերջինիս ներկայացուցիչները Մոսկուայի մէջ ընդունելու ծրագիրներ չունի: Լաւրով յայտնեց, որ Չաուշօղլու յոյս յայտնած է, որ միջազգային միջոցառումի մը ընթացքին, մասնաւորաբար Պելլրատի մէջ 3-4 Դեկտեմբերին նախատեսուած ԵԱՀԿ-ի Նախարարական խորհուրդին ընթացքին կրնան միասնաբար նստիլ՝ հանդարտօրէն քննարկելու համար ամէն բան, «սակայն ես պատասխան մը չտուի, նախ եւ առաջ պէտք չէ քննարկենք, այլ հասկնանք տեղի ունեցածին ամէն երեւոյթները»: «Մենք հանդիպումներէ փախուստ չենք տար, նախարար Չաուշօղլուի հետ իմ այսօրուան գրոյցս ատիկա կը փաստէ», ըսաւ Լաւրով:

«Ներկայիս (Ռուսիոյ) կառավարութիւնը կը սերտէ (Թուրքիոյ հետ) ամբողջ յարաբերութիւնները», ըսաւ ան՝ աւելցնելով, որ իրենք չեն ուզեր թուրք արտադրողներու եւ արտածողներու կամ ռուսական ընկերութիւններու համար արհեստական խնդիրներ ստեղծել, «սակայն չենք կրնար տեղի ունեցածը անպատասխան ձգել»:

Լաւրով ըսաւ, որ իր թուրք պաշտօնակիցը ցաւ յայտնած է «Սու-24»-ի միջադէպին համար, սակայն միեւնոյն ժամանակ փորձած է արդարացնել թրքական օդուծին արարքը: «Մենք երեկ

թրքական կողմեն, այդ ալ աւելի բարձր մակարդակով բացատրութիւններ կը սպասէինք: Աւելի լաւ է ուշ ըլլայ, քան երբեք», ըսաւ Լաւրով:

«Թուրքիան ի՞նչ պէտք է ընէ կացութիւնը բնականոնացնելու համար: Պէտք է եզրակացութիւններու յանգիլ, ի վերջոյ երէկուանին պէս յարձակումները բացարձակապէս անընդունելի են: Նախարար Չաուշօղլուէն ցաւակցական խօսքեր լսեցի, սակայն մնացեալ բոլոր խօսքերը կը ձգտէին արդարացնել թրքական կեցուածքը»:

Չաուշօղլու վստահեցուցած է, որ Անգարա կ'ուզէ պահպանել Մոսկուայի հետ բարեկամական կապերը, սակայն մերժած է յայտնել, եթէ Թուրքիա պիտի փակէ Սուրիոյ մէջ զինեալներուն մատակարարման ճամբան:

Լաւրով նաեւ նշեց, որ «Սու-24»-ին դէմ յարձակումը կը թուի ծրագրուած գրգռութիւն մը ըլլալ՝ աւելցնելով, որ կարգ մը ռուս զործընկերներ գայն «բացայայտ թակարդ մը» կը նկատեն:

Ռուսիոյ նախագահ Վլատիմիր Փութին յայտարարեց. «Մեր պատերազմական օդանաւին վար առնուելուն հետ պիտի վարուինք ամենայն լրջութեամբ եւ մեր տրամադրութեան տակ գտնուող միջոցները պիտի օգտագործենք մեր անվտանգութիւնը երաշխաւորելու համար»:

Ան թրքական ղեկավարութիւնը ամբաստանեց Թուրքիոյ մէջ ծայրայեղականութիւնը տարածելու դիտաւորեալ քաղաքականութիւն կիրարկելու յանցանքով:

Մինչ այդ, Ռուսիոյ պաշտպանութեան նախարար Սերկէյ Շոյկու յայտարարեց, որ իր երկիրը Սուրիոյ Հումէմիմ զօրակայանին մէջ «Էս-400» հակաօդային համակարգեր պիտի տեղակայէ՝ աւելցնելով, որ Լաթաքիոյ ծովափին դիմաց գտնուող «Մոսքվա» յաճանաւը պատրաստ է վնասազերծելու որեւէ թիրախ, որ վտանգ կը ներկայացնէ:

Ռուսիոյ վարչապետ Տիմոթեյ Մետվետեւ իր կարգին զգուշացուց, որ թրքական ընկերութիւնները պիտի կորսնցնեն ռուսական շուկային մէջ իրենց բաժինը: Ան Անգարան ամբաստանեց ՏԱՀԵՇ-ը պաշտպանելու յանցանքով՝ աւելցնելով, որ կարգ մը թուրք պատասխանատուներ ահաբեկչական խմբաւորման հետ քարիւղի առետուրին մէջ նիւթական շահեր ունին:

Ըստ Լիբանանի մէջ Ռուսիոյ դեսպան Ալեքսանտր Չասիփքինի, ռուսական հակադարձութիւնը պիտի ներառէ Թուրքիոյ հետ ապահովական ու տնտեսական յարաբերութիւնները՝ աւելցնելով, որ Ռուսիա ՏԱՀԵՇ-ի վերահսկողութեան տակ գտնուող քարիւղ փոխադրող բեռնատարները հարուածելով վնաս պատճառած է Թուրքիոյ:

Ռուսիոյ դաշնակցային խորհուրդի նախագահ Վալենթինա Մաթվիենքօ յայտարարեց, որ Ռուսիան կ'ակնկալէ, որ Թուրքիան ներում հայցէ «Սու-24»-ը վար առնելուն համար եւ փոխհատուցէ զոհուած սպայի ընտանիքին հասած վնասը: «Մենք Թուրքիայէն կ'ակնկալենք, որ ան ընդունի կատարուած գործողութեան անօրինականութիւնը եւ փոխհատուցէ Ռուսիոյ ու զոհուած սպայի ընտանիքին հասած վնասը», ըսաւ ան՝ աւելցնելով. «Յանցագործութիւնը անպատիժ պիտի չմնայ եւ անխուսափելիօրէն պիտի ազդէ Թուրքիոյ հետ Ռուսիոյ յարաբերութիւններուն վրայ»:

Հաղորդենք, որ «Սու-24»-ի վար առնուելէն վերապրած ռուս օդաչուն Չորեքշաբթի օր հերքեց, թէ թրքական օդանաւերը կրակ բանալէ առաջ զգուշացուցած են զիրենք: Նշենք, որ ցուցարարներ Չորեքշաբթի օր քարկոծեցին Մոսկուայի մէջ Թուրքիոյ դեսպանատունը:

ԱՆԴՐԱԴԱՐՁ

Նախապատերազմական Իրավիճակի Ստեղծման Թրքական Դրդապատճառներ

Ռուսական զինուորական օդանավի խոցումը Թուրքիոյ կողմէ սուրիական պատերազմին նոր մագլցողականությունն ապահովող քայլ է եւ իբրեւ այդպիսին այլապէս ալ դժուար մեկնաբանելի: Օր մը առաջ Անգարայի կողմէ կատարուած յայտարարութիւններու տարողութեան բարձրացումը եւ ՄԱԿ-ի ապահովութեան խորհուրդի արտակարգ նիստի պահանջը հիմնուած էին Անգարայի հովանաւորեալ Սուրիոյ թուրքմէններուն հանդէպ Մոսկուայի իրականացուցած զինուորական գործողութիւններու երեւոյթին վրայ:

Այսօրուան իրադարձութիւններուն զարգացումը պատերազմը տեղափոխեցին ռուս-թրքական ուղղութեան վրայ: Կանխատեսումները խայտաբղետ են այս առումով: Մագլցողականութեան տեսանկէտիւնը ենթահող շահած է եւ որոշ վերլուծումներու մէջ չի բացառուիր ոչ միայն Մոսկուա – Անգարա դիւանագիտական կապերու խզումը, այլ նաեւ Ռուսիա – Թուրքիա պատերազմը:

Կանխատեսումներու իրատեսականութիւնը՝ իր կարգին: Այնուամենայնիւ իրավիճակը նախապատերազմական է: Ռուս արտաքին գործոց նախարարը կը ջնջէ իր այցելութիւնը Անգարա, կը զգուշացնէ ռուս քաղաքացիներուն չմեկնիլ Թուրքիա, ռուսական զբօսաշրջութեան մեծագոյն ընկերութիւնը դէպի Թուրքիա իր ծրագիրները կ'առկախէ, մինչ ռուս լրագրողներ փոխադրող հանրակառքը կ'ենթարկուի յարձակումի, իսկ հրթիռակոծումի՝ ռուսական ուղղաթիռը:

Մոսկուա – ՏԱՀԵՇ պատերազմին բովին մէջ եւ Մոսկուա – Անգարա նախապատերազմական իրավիճակի ստեղծման նախօրեակին թուրքմէններու հարցին օգտագործումը Անգարայի կողմէ խորքին մէջ ծխածածկոյթի տակ առնել էր յարձակողականի դիմելու բուն դրդապատճառները:

Անկասկած Թուրքիա-Սուրիա սահմանին թուրքմէն ազգաբնակչութիւնը Անգարայի ներշնչումին տակ պահելը եւ զայն զինուորաքաղաքական գործօնի վերածելը կարեւորագոյն առաջադրանք էր Անգարայի համար: Խնդիրը սակայն շատ աւելին էր:

Ռուսական կործանիչները ըստ էութեան կը քանդէին Թուրքիա-ՏԱՀԵՇ ցամաքային կամուրջները՝ կանխարգիլելով Անգարայի եւ ՏԱՀԵՇ-ի միջեւ ստեղծուած ուղղակի կապը: Ռուսական միջամտութիւնը նաեւ արգելակումն էր Թուրքիոյ եւ Սուրիոյ միջեւ անվտանգութեան գօտիի ստեղծման ծրագիրին, որ ի դէպ միայն ռուսական կողմէն չէ, որ կը խոչընդոտուէր:

Թրքական յարձակումը ռուսական օդանաւին դէմ պատերազմական յստակ գործողութիւն էր, որ կտրուկ մագլցումի տարաւ տիրող լարուած իրավիճակը: Թուրքմէններու գործօնին շահարկումը այստեղ զուտ պատրուակային բնոյթ ունէր: Թուրքիան հարուածուած էր ոչ միայն ցամաքային կամուրջներու քանդումով, այլ նաեւ ՏԱՀԵՇ-ի ֆինանսաւորումով: Հսկայական գործարքը կը փլուզուէր, երբ ՏԱՀԵՇ-ի քարիւղի արդիւնաբերութիւնը եւ քարիւղատար հարիւրաւոր բեռնակառքեր կ'ոչնչացուէին ռուսական կործանիչներուն կողմէ: Իրօք ռուսերը կործանարար դեր կը կատարէին թրքական տնտեսութեան: Քարիւղի արտահանումը դէպի Թուրքիա եւ անոր դիմաց ՏԱՀԵՇ-ի ֆինանսաւորումը Թուրքիոյ կողմէ լուրջ հարուած կը ստանար:

Աքթ մը անհրաժեշտ էր Թուրքիոյ համար այս կործանարար ընթացքը պահ մը կասեցնելու եւ իրադրութիւնները փորձել շեղելու համար: Մեծ ռիսք պարունակող քայլ էր Անգարայի կատարածը, թէկուզ հետեւանքներու անկանխատեսելիութեամբ, ինչ որ կը նշանակէր, որ Անգարան սկսած էր սոլտ խաղալ:

Ռուսիոյ նախագահին յայտարարութիւնը պատասխանատուութեան սլաքը կ'ուղղէր Միացեալ Նահանգներուն եւ ՕԹԱՆ-ին: Կը յիշէր, որ Մոսկուան Ուաշինկթընի հետ օդային միջադէպերու նախազգուշացման մասին համաձայնութիւն ունէր եւ այժմ՝ թիկունքէն հարուած:

Թիկունքէն հարուածուած ըլլալու հաստատումը ենթադրել կու տայ, որ Թուրքիան հակահարեկչական պատերազմ յայտարարածներու շարքին է եւ միջազգային համաձայնութեան ենթակայ կողմ: Խորքին մէջ սակայն թիկունքի հարուած չէ, այլ ուղիղ հակառակորդի: Մինչ Թուրքիոյ վարչապետի գործակատարը կը յայտարարէր, որ իր երկրին գործողութիւնը իրաւաչափ է՝ նկատի ունենալով, որ անշուշտ ըստ իրեն, ռուսական օդանաւը հատած է թրքական օդային սահմանը:

Մուրիական պատերազմը սուրիական բանակ, ազատ բանակ, ժապիաթ Նուսրա – ՏԱՀԵՇ, ապա քիւրտ զինեալ ուժեր, զինուոր թուրքմէններ ու տակաւին իրանեան գործօնի ներկայութիւն եւ ապա ռուսական օդուժ ձեւափոխումներէն ետք այժմ թեւակոխած է ռուս – թրքական նախապատերազմական իրավիճակ:

Աւելցնենք, որ Փութինի օգնական Փեսքով խօսելով պատասխանի մասին յայտնեց, թէ անկառաւարկական ճանապարհով պիտի չըլլայ: Ինչ որ կիսապաշտօնական բնոյթ ունի, բայց չի կրնար նախանշել դէպքերու հետագայ զարգացումները:

«Ա.»

ԳԱՆՁՈՒՄՆԵՐ ԱԶԳԱՅԻՆ ՏՈՒՐՔԻ

Սրբոց Վարդանանց Եկեղեցւոյ Թաղական Խորհուրդս, 2015 տարուան Ազգային Տուրքերու գանձումը յանձն առնելով, կը խնդրէ համայնքի անդամներէն, որ իրենց վճարումները կատարեն Ուրբաթ օրերը, Թաղականութեան կամ Առաջնորդարանի քարտուղարութեան սենեակը: Ազգային Տուրքը, ամէն հայու բարոյեական պարտաւորութիւնն է:

Հետեւաբար կատարելով Ձեր պարտաւորութիւնը, նաեւ օժանդակած կ'ըլլաք ազգային գործընթացի հեզասահ ընթացքին, որուն պահանջատէրն էք դուք: Անոնք, որոնք կը փափաքին շաբթուան ընթացքին իրենց վճարումները կատարել, կրնան ամէն օր առաւօտեան 9 էն մինչեւ 1, հանդիպիլ Ազգային Առաջնորդարան, բացի Կիրակի օրերէն:

**ԹԱՂԱԿԱՆՈՒԹԻՒՆ
ՍՐԲՈՑ ՎԱՐԴԱՆԱՆՑ ԵԿԵՂԵՑԻՈՑ**

ԱԿՆԱԼԿ

ՄԵՐ ՏՈՒՆԸ



ՀԱՅԱՍՏԱՆ
ՀԱՄԱՀԱՅՎԱԿԱՆ
ՀԻՄՆԱԴՐԱՄ-ԼԻԲԱՆԱՆ



Այսօր կը մեկնարկէ «Հայաստան» համահայկական հիմնադրամի տարեկան հերթական հանգանակութիւնը: «Հայաստան» հիմնադրամը հաւանաբար համահայկական առաջին ցանցային եւ բրգաձեւ կառոյցն է, որուն մէջ ներառուած են Հայաստանի եւ Արցախի հանրապետութիւններն ու սփիւռքը իր բոլոր բաղադրատարրերով: Ըստ էութեան «Հայաստան» համահայկական հիմնադրամի կառուցաձեւին հիման վրայ էր, որ աւելի ուշ կեանքի կոչուեցան Հայոց ցեղասպանութեան 100-ամեակի պետական եւ տարածաշրջանային յանձնախումբերը:

«Հայաստան» հիմնադրամը հիմնովին կը ծառայէ հայրենաշինութեան նպատակին: Թիրախային առաջնային գօտիներ ընտրուած են Արցախն ու սահմանամերձ շրջանները, եւ հսկայական աշխատանք իրականացած է ճանապարհաշինութեան, դպրոցաշինութեան, եւ ենթակառոյցներու տարբեր ոլորտներու շինարարական առումով:

Դրամական հանգանակութենէն անկախ «Հայաստան» հիմնադրամը հայրենաշինութեան նուիրական առաջադրանքին յաջողած է լծել համայն հայութիւնը:

Լիբանանահայութիւնը ահաւասիկ տասը տարիէ ի վեր իր գործնական մասնակցութիւնը կը բերէ «Հայաստան» հիմնադրամի կեդրոնական հոգաբարձութեան ճշդած նպատակային աշխատանքներուն: Ո՛չ ապահովական պայմանները, ո՛չ տնտեսական դժուարութիւնները եւ ո՛չ ալ քաղաքական վերիվայրումներով յառաջացած անորոշութիւնը կրցած են պատճառ դառնալ, որ լիբանանահայութիւնը նուազագոյն նահանջ արձանագրէ իր գիտակցական պարտաւորութեան մէջ:

Աշակերտական միջավայրերէն մինչեւ տարեցներ, արհեստաւորներէն մինչեւ գործարար շրջանակներ ու տակաւին կուսակցական, յարանուանական եւ միութենական բոլոր շրջանակները անխտիր ոգի ի բռին ձգտած են հերթական տարի ապահովուած նախորդ արդիւնքը գերակատարելու:

Այս ձգտումն է, նշաձողը բարձրացնելու այս ինքնամղումը, որ կանգուն կը շարունակե պահել լիբանանահայության մասնակցության ոգին. մանաւանդ երբ հարցը կը վերաբերի հայրենաշինարարական աշխատանքին: Մարմարաշէնի գիւղի ջրամատակարարում, Մատաղիս գիւղի մանկապարտէզի նորոգութիւն, Նոյեմբերեանի հիւանդանոցի նորոգութիւն, Մեծ Շէն գիւղի համայնքային կեդրոնի կառուցում, Մարգասաշէն գիւղի ջրամատակարարում, Խաչմաչ գիւղի համայնքային կեդրոնի կառուցում եւ Վարդէնիս-Մարտակերտ մայրուղիի կառուցում, առանց մոռնալու սուրիահայ եւ լիբանանահայ վարժարաններուն յատկացուած օժանդակութիւնը: «Հայաստան» համահայկական հիմնադրամի Լիբանանի մարմինի նկատառելի աշխատանքային այս հանրագումարը այս տարի կը համալրուի «Մեր տունը» ծրագիրին մասնակցութեամբ:



Այս անգամ թեման, խորագիրը եւ նպատակը «Մեր տունն» է: Արցախահայության մօտ բազմազաւակութեան երեւոյթը քաջալերելու կոչուած այս ծրագիրը, իր տեսքով ընկերային-տնտեսական բնոյթ ունենալով հանդերձ, ըստ էութեան ռազմավարական հսկայական նշանակութիւն ունի:

Խնդիրը ուղղակիօրէն կապուած է ժողովրդագրական պատկերին կայացման հրամայականին հետ: Ճիշդ է, որ ապահով երդիքի տրամադրումով բազմանդամ ընտանիքներու կենցաղային նուազագոյն պայմանները կը լուծուին, միաժամանակ սակայն կը քաջալերուի բազմազաւակութիւնը եւ ասով իսկ նպաստ կ'ապահովուի Արցախի ժողովրդագրական պատկերի կայացման: Արցախահայության աճը ինքնին կը նպաստէ բանակցութիւններուն ընթացքին հայկական կողմին առաւելներ ապահովելով:

Տարածքները կ'իմաստաւորուին բնակելիութեամբ: Բնակելիութիւնը ինքնին քաղաքական յաղթաթուղթ է հակամարտութեան բանակցային գործընթացին արդար դատ պաշտպանող կողմին համար: Նաեւ միջազգային ընտանիքին համար ժողովրդավար կարգերու յարգման համար որեւէ հանրաքուէի մասնակցութեան թիւը, կամ տուեալ պահու ինքնորոշումը պայմանաւորուած է տարածքին վրայ ապրող մարդոցմով:

Բազմազաւակութիւնը բնակեցում է: Բնակեցումը իր կարգին քաղաքական յաղթաթուղթ է, ազատագրուածը իմաստաւորելու ամէնէն հիմնական միջոցը:

Շինենք տունը. այցելենք տնեցիներուն: Ինչու չէ ունենանք նաեւ սեփական տուն: ՄԵՆ ՏՈՒՆԸ:

WWW.AZTAGDAILY.COM

ԼՈՒՐԵՐ ԳԱՂՈՒԹՆԵՐԷՆ

**«Հայաստանի Բնապահպանության Անկումը
Հայրենիքի Անկումն Է». Սերժ Թանքեան**



«Արմինիըն թրի փրոճեքթ»-ի («Ծառատունկի հայկական նախագիծ») Լոս Անճելըսի մեջ տեղի ունեցած ընթրիք-հանդիպման իրենց մասնակցությունն ու աջակցությունը բերած են «Միսթըրմ աֆ է տաուն» խումբի մենեթրգիչ Սերժ Թանքեանը ու քանատացի նշանավոր դերասան Տեյվիտ Ալպեյը: Այս մասին գրուած է «Արմինիըն թրի փրոճեքթ» կայքին մեջ:

Պեւըրլի Հիլզի մեջ 400 հիւրերու մասնակցութեամբ տեղի ունեցած ձեռնարկին

ընթացքին անդրադարձ կատարուած է զանգուածային ծառատունկի միջոցով Հայաստանի բնապահպանական համակարգը փրկելու, այդպիսով ալ Հայաստանը փրկելու երեւոյթին:

Սերժ Թանքեան, որ երկար տարիներ կանգնած է «Արմինիըն թրի փրոճեքթ»-ի կողքին եւ մեծ ներդրում ունի Հայաստանի մեջ կազմակերպութեան բնապահպանական ծրագիրներու իրականացման մեջ, ըսած է. «Դժուար է մարդոց փոխանցել այն գիտակցութիւնը, որ Հայաստանի բնապահպանութեան անկումը հայրենիքի անկումն է: «Արմինիըն թրի փրոճեքթ»ին կախարդական դերակատարութիւնը այն է, որ ան կը ստիպէ մարդիկը՝ այս իրողութիւնը լաւապէս հասկնալու»: Երգիչը խօսած է «Արմինիըն թրի փրոճեքթ»-ի եզակի առաքելութեան մասին՝ նշելով, որ կազմակերպութիւնը բնապահպանական զարթօնքի սկիզբ դրած է ո՛չ միայն Հայաստանի քաղաքացիներուն, այլ նաեւ՝ սփիւռքահայերուն գիտակցութեան մեջ:

Երեկոյին երկրորդ հիւրը՝ Աթոմ Էկոյեանի «Արարատ» ժապաւենին մեջ Բաֆֆիին դերը ստանձնած քանատացի դերասան Տեյվիտ Ալպեյ ըսած է, որ մեծապէս տպաւորուած է Հայաստան կատարած իր այցելութեամբ եւ կը փորձէ աջակցիլ Հայաստանի բնապահպանութեան: «Ծառ տնկելով՝ մարդ արմատ կը նետէ իր հայրենի հողին մեջ», ըսած է դերասանը:

«Ծառատունկի հայկական նախագիծ» կազմակերպութեան հիմնադիրները նշած են, որ այս տարի Հայաստանի մեջ կրցած են տնկել հինգ միլիոնէրորդ ծառը:

**Հայ-Ամերիկեան Թանգարանի Ծրագրի
Քննարկում Կլենտլի
Քաղաքապետարանին Մէջ**

Նոյեմբեր 10-ին տեղի ունեցաւ խորհրդակցական հանդիպում մը Կլենտլիի քաղաքապետ Արա Նաճարեանի եւ քաղաքի վերակացու Սքաթ Օչոյայի հետ Հայ-ամերիկեան թանգարանի շինութեան ծրագրի մասին: Հանդիպումին մասնակցեցան թանգարանի խնամակալութեան

համաատենապետներ՝ Մուշեղ արք. Մարտիրոսեան եւ Յովնան արք. Տէրտէրեան, նաեւ՝ թանգարանի շինութեան յանձնախումբի ատենապետ Պերճ Կարապետեան:

Խորհրդակցութեան նպատակն էր քննարկել քաղաքին պատկանող քաղաքապետութեան հանդիսասարահի կից գտնուող 1,7 արտավար տարածութեամբ հողամասի մը վրայ թանգարանի շինութեան «Կրաունտ լիս»-ի համաձայնագիրի պայմանները:

Հանդիպումի աւարտին առաջնորդ սրբազանը գոհունակութիւն յայտնեց Կլենտլիի քաղաքապետին եւ քաղաքապետական խորհուրդին, որոնք քաջալեր կը հանդիսանան թանգարանի շինութեան ծրագրին եւ հաստատեց, որ թանգարանի իրագործումը հանրութիւնը պիտի մղէ մշակութային բազմազանութեան ընդունման եւ գնահատանքին, որ պիտի արդիւնատրուի հանդուրժողութեան ոգիով եւ նախապաշարումներու առաջը առնելով:

Վարդգէս Գուրուեան Հայաստանի Կրթութեան Եւ Գիտութեան Նախարարութեան Կողմէ Կը Պարզեւատրուի Ոսկիէ Մետալով

Վերջերս Լոս Անճելըսի մէջ Հայաստանի հիւպատոսարանի դահլիճին մէջ Հայաստանի կրթութեան եւ գիտութեան նախարարութիւնը բարձրագոյն պարգեւով՝ ոսկիէ մետալով պարգեւատրեց վաստակաշատ մանկավարժ Վարդգէս Գուրուեանը՝ անոր կրթական, կուսակցական, միութենական, մշակութային, երիտասարդական, եկեղեցական, ընկերային, համայնքային ազգանուէր եւ հայանպաստ գործունէութեան 50 տարիներու նուիրեալ ծառայութեան համար:



Ա. հիւպատոսի տեղակալ Վալերի Մկրտումեան խօսք առնելով՝ անդրադարձաւ Վարդգէս Գուրուեանի մանկավարժական եւ համայնքային գործունէութիւններուն՝ մեծապէս գնահատելով անոր ցուցաբերած ջերմ ընդունելութիւնները հայաստանեան զանազան այցելու խումբերու նկատմամբ եւ անոր անսակարկ մասնակցութիւնը հիւպատոսարանի համայնքային աշխատանքներուն եւ ձեռնարկներուն:

Հիւպատոս Արամելլա Շաքարեան յիշեցուց, որ իր դուստրը յաճախած է Արշակ Տիգրանեան վարժարան, եւ թէ իրենք միայն դրական յիշողութիւններ ունին տնօրէն Վարդգէս Գուրուեանի մասին:

Էմմա Ումրոյեան (նախկին ուսուցչուհի) եւ տոքթ. Արմինէ Գլրճեան (նախկին ծնողք) խօսք առնելով՝ բարձր գնահատանքով խօսեցան տնօրէն Վարդգէս Գուրուեանի մասին՝ որպէս տնօրէնի եւ որպէս «աշակերտներու երկրորդ հօր»: Անոնք վեր առին Գուրուեանի վարչական կարողութիւնները եւ անոր արդար վերաբերմունքը ուսուցիչներուն հանդէպ:

Աւարտին շնորհակալական խօսքով ելոյթ ունեցաւ Վարդգէս Գուրուեանը, որ տակաւին համայնքին օգտակար ըլլալու իր պատրաստակամութիւնը յայտնեց:

WWW.AZTARAR.COM

ԵՐԻՏԱՍԱՐԴԱԿԱՆԻ ԱՆԿԻՆԸ



AYF - KWT
ՔՐԻՍՏԱՓՈՐ

Մէկ Դար ու Քառորդ Անխոնջ
Պայքարի Ճամբուն Վրայ

Ժողովուրդի մը դժուար պայմաններուն և թշուառութեան ընթացքին է, որ կը ծնին գործիչներ, որոնք իրենց գաղափարներուն և աշխատանքներուն շնորհիւ կը դառնան անմահ հերոսներ և դարեր ետք անոնց յիշատակը անմար կը մնայ ժողովուրդին մէջ:

Հայ ժողովուրդի երկար տարիներու տագնապալի վիճակը, բռնատիրութիւնները, աշխարհասփիռ դառնալն ու փոքրամասնութիւն կազմելը զանազան երկիրներու մէջ և հետևաբար շատ մը մարդկային պարզ իրաւունքներու կորուստը, մղիչ ուժը եղան ազգասէր և անձնուրաց երեք երիտասարդներու՝ Քրիստափոր Միքայէլեան, Միւնն Զավարեան և Ստեփան Զօրեանի, որոնք գերադասեցին իրենց հայրենակիցներուն շահը, իրենց իսկ անձնական եւ-էն ու նպատակներէն, գերագոյն և հիմնական նպատակ ունենալով՝ համախմբել հայ ժողովուրդի ուժերը և ձեռք բերել քաղաքական և տնտեսական ազատութիւն Արևմտեան Հայաստանի համար, ձեռնարկեցին և ընդառաջեցին հիմը դնելու Հայ Յեղափոխական Դաշնակցութեան:

125 տարիներ առաջ դաշնակցութիւնը ծնունդ առաւ Թիֆլիսի մէջ, որ մինչև օրս կը գործէ եւ Հայաստանի մէջ եւ բազմաթիւ երկիրներու և քաղաքներու տարածքին, տանելով լայնածաւալ աշխատանք, ի նպաստ՝ Հայ Դատին և հայապահպանման:

Կուսակցութիւնը, իր վեհ գաղափարին ներքև, յանուն ազատութեան, հայրենի հողին ու ազգին, շարունակաբար հերոսներ ծնաւ, որոնք իրենց լաւագոյնը յայտնելով և ամբողջականապէս նուիրուած՝ ամէն գնով, անխոնջ պայքար մղեցին, ու ոչ մէկ ճիգ չխնայեցին ապացուցելով աշխարհին եւ յատկապէս Թուրքիոյ՝ Հայ ժողովուրդի նպատակաւացութիւնն ու գոյատևման շարունակական կամքը: Հետևելով այդ հերոսներու իտէպին, կերտուեցան պահանջատէր սերունդներ, խոստանալով շարունակել իրենց նախնիներուն տարած պայքարն ու պահանջատիրութիւնը, հասնելու համար Հայ Դատի արդար լուծման:

Այսօր, սփիւռքի զանազան երիտասարդական և պատանեկան միութիւններ, ինչպէս նաև Հայ Դատի յանձնախումբեր, կու գան վերանորոգելու իրենց ուխտը եւ տէր կանգնելու հայ ժողովուրդի պատմութեան հերոսներուն ժառանգած աշխատանքին, արդար լուծումը վաստկելու և Սուրբ նպատակը իրականացնելու ի նպաստ:

Վերջապէս, կու գանք բարձրացնելու Քուէյթի Երիտասարդական Միութեան ձայնը, շնորհաւորելու Հայ Յեղափոխական Դաշնակցութեան հիմնադրման 125 ամեակը: Այս տօնը բոլորիս համար հպարտութեան ներշնչանք է ու պատուաբեր առիթ:

Փա՛նք ձեզ Հայրենիքի և Հայութեան պարծանք հերոսներ՝ Հայ Յեղափոխական Դաշնակցութեան հիմնադիրներ:

ՌԻԹԱ ՏԵԿԻՐՄԷՆՃԵԱՆ

WWW.ARMENIANPRELACYKW.ORG

Հ.Դ. ՊԱՏԱՆԵԿԱՆԻ ԱՆԿԻՆԸ

Խրիմեան Հայրիկ

Բուն անունով՝ Մկրտիչ Խրիմեան: Ծնած է 1820 թուականին, Վան: Կանուխէն որք մնալով՝ մեծցած է հօրեղբօր խնամքին տակ: 1847-ին մեկնած է Պոլիս ուսումը շարունակելու նպատակով, սակայն նիւթական դժուարութիւններու հետեւանքով ստիպուած է դասաւանդել հայերէն լեզու՝ Պոլսոյ Խասագիւղի հայ աղջկանց դպրոցին մէջ:



1853-ին ան կը կորսնցնէ իր մայրը, կինը եւ զաւակը: Անկէ ետք, 1854-ին Աղթամարի մէջ կը ձեռնադրուի Վարդապետ: Վերադառնալով Վան, կը հաստատուի Վարագայ Վանք, ուր կը շարունակէ հրատարակել իր թերթը:

1862-ին կ'ընտրուի Տարօնի առաջնորդ եւ կը փոխադրուի Մշոյ Սուլթան Սուրբ Կարապետ վանք, իր հետ տանելով թերթը, վերանուանելով զայն՝ «Արծուի Տարօնոյ»:

1892-ին կ'ընտրուի Ամենայն Հայոց Կաթողիկոս ու կ'անցնի Էջմիածին: Ժողովուրդը զինք կը կոչէ **Հայոց Հայրիկ**:

1878 թուականին, Պերլինի Վեհաժողովին ղրկուած պատուիրակութեան նախագահ՝ Խրիմեան Հայրիկ: Վերադարձին, Պոլսոյ մէջ զինք ղիմաւորող հայ բազմութեան կը խօսի **«Հարիսային Կաթսան Եւ Երկաթէ Շերեփը»** ճառը:

«Վեհաժողովին մէջտեղը դրուած էր մեծ կաթսա մը Հարիսա, միւս պահանջատէր պատգամավորները քաշեցին իրենց սուրերը եւ իբրեւ երկաթէ շերեփ, խոթելով հարիսայի կաթսային մէջ՝ իրենց բաժին հարիսան առին, հպարտ եւ համարձակ հեռացան: Կարգն եկաւ հայոց պատգամավորին . ես մոտեցայ եւ Ազգային Ժողովին կողմէ ձեռքս տրուած աղերսաթուղթը ներկայացուցի եւ աղերսեցի, որ իմ ամանս ալ լեցնուն հարիսան: Այնժամ կաթսայի գլուխ սպասող մերձաւորներ հարցուցին ինձ .«Ո՛ր է քո երկաթէ շերեփը : Հիրավի, հոս հարիսա կրճմուի, բայց երկաթէ շերեփ չունեցողը չի կարող անոր մոտենալ »:

Է՛հ սիրելի ժողովուրդ Հայոց , ես կրնայի՞ հարիսայի կաթսային մէջ խոթել իմ թուղթէ շերեփը , որ պիտի թրջուէր ու հոն մնար:

Ժողովուրդ Հայոց, անշուշտ լաւ հասկցաք , թէ զէնքը ինչ կրնար գործել եւ կը գործէ.... Ուրեմն զէնք առնենք եւ դարձեալ զէնք: Ժողովուրդ, ամենէն առաջ քո ազատութեան յոյսը քո վրայ դիր, քո խելքին ու բազուկին ուժ տուր»:

Այս էր Խրիմեան Հայրիկի նշանաւոր ճառը, որ առակի ձեւով ներկայացնելով, ազատութեան ձգտող ժողովուրդներու պարագան իբր համոզում կը յայտնէ եւ որ փրկութեան ելքը միայն ազգային ազատագրական զինեալ պայքարն է:

Հ.Դ. Պ.Մ.

Քարոզչական յանձնախումբ